

Powšitkowne WOZJEWJENJA

njedźelu, 25. meje 2014

Nalětni koncert w klósterskej zahrodže

W klósterskej zahrodže w Pančicach-Kukowje wuhotuje chór Lipa zhromadnje z muskim chórom Delany njedźelu, 25. meje, swój tradicionalny nalětni koncert. Započatk je w 15.30 hodź. Hižo wot 15.00 hodź. poskići so kofej a samopječeny tykanc. Wšitcy hudźbnje zajimowani su wutrobnje do krasnje kćějaceje zahrody přeprošeni.

Dla přirodneje katastrofy na Balkanje namołwja TCM:

Potrjechenym powodženja pomhać

Po wobydlerskej wójnje před 20 lěta je nětko wulke powodženje Balkan domapytało. Direktor Carity w Bani Luce w Bosniskej a Hercegowinje, dr. Miljenko Aničić, pisa w lisće, zo „móžeš wusutki powodženja jeničce ze scěhami wójny přirunować“.

Towarstwo Cyrila a Metoda z.t. (TCM) chce ze swojej akciju „Łužica pomha“ rady potrjechenych w biskopstwje Banja Luka podpěrać, hdžež je hižo wokoło lěta 2000 pomhało. Dr. Aničić poby swjat-kownu pónđzelu 2001 na putnikowanju w Róžeńće.

Najskutkowniša je finacielna pomoc. By-li kóždy dorosceny katolski Serb jeničce dwaj euraj darił, by so wjace hač 10.000 eurow nahromadziło. Wězo je kóždy pozbudženy, wjace dać. Darowanska kwitowanka wustaji so tym, kotřiž swoju poľnu adresu podadza. Dary přepokazać móža so na konto Cyrill-Methodius-Verein, kontowe čisło 828 23 66, BLZ 750 90 300 pola banki LIGA respektiwne IBAN DE65 750 90 300 000 828 23 66, BIC GENO DEF1 M05 pod hesłom „Banja Luka“.

Duchowna hudźba w Budyskej serbskej cyrkwi

Hudźba Heinricha Schütza a Johanna Sebastiana Bacha zaklinči njedźelu, 1. junija, we 18.00 hodź. w Budyskej cyrkwi Našeje knjenje. Lipšćancscy wuměłcy – sopranistka Kathleen Danke, basist Gotthold Schwarz kaž tež Hartmut Becker na violoncellu a Michaela Hasselt na piščelach – wurjadny program wuhotuja. Zastup je darmotny.

Pobožnosť w Róžeńčanskej swjatnicy

Towarstwo „Naša Knjeni na Lipje z.t.“ přeprošuje wšitkich česćowarjow Róžeńčanskeje maćerje Božeje na pobožnosť jako džak a próstwu a wo zastupnistwo při Božim trónje. Wona budže wutoru, 27. meje, po wječornej Božej mši, kotraž je we 18.00 hodź., w Róžeńčanskej swjatnicy. Na pobožności chcemy so w naležnosćach našeho towarstwa, našich wosadow, našeho ludu kaž tež w swojich wosobinskih modlić.

Předsydstwo

Pěši do Częstochowy

Tež lětsa pozbudza farar Beno Jakubaš, so w serbskej skupinje na putnikowanje z Waršawy do Częstochowy podać. Hić smě kóždy sobu, kotryž je 18. žiwjenske lěto docpěł. Termin putnikowanja je wot 5. do 15. awgusta. Zajimcy njech so hač do njedźele, 29. junija, pola fararja Bena Jakubaša w Njebjelčicach přizjewja, telefonowe čisło (0 35 78) 30 20 05.

„Što trjeba čłowjek na kóncu žiwjenja?“

Ambulantna hospicna služba Carity přeprašuje wšitkich zajimcow na přednošk k temje „Što trjeba čłowjek na kóncu žiwjenja?“ wutoru, 3. junija, w 19 hodź. w ewangelskej wosadnicy na Angeru w Kamjencu. Tema ma so w podiumowej diskusiji z lěkarskeje, hladanskeje, dušepastyrskéje a hospicneje strony wobjednać. K tomu porěča kompetentni partnerojo.

Putnikowanje młodžiny do Krupki

Młodostni wot 16 lět su přeprašeni, wot njedźele, 27. julija, hač do pjatka, 1. awgusta, do Krupki putnikować. Přizjewić móža so hač do pjatka, 27. junija, na farje w Chróśćicach, telefonowe čisło (03 57 96) 8 04 00. Po tym so hižo žane přizjewjenja njepríwozmu. Putnicy zetkaja so njedźelu, 29. junija, po nyšporje w Chróśćicach na farje. Za wšitkich nowačkow je tute zetkanje winowatosć. Nyšpor je w 14 hodź. Putniska Boža mša w Krupce budže srjedu, 30. julija, w 10 hodź.

Putnikowanje serbskeje młodžiny

Putnikowanje dekanatneje młodžiny k maćeri Božej na lipje do Różanta budže na njedźeli Swjateje Trojicy, 15. junija. Kemše započnu so w 10.30 hodź.

Koparski turněr serbskich młodostnych

Koparski turněr dekanatneje młodžiny budže sobotu, 21. junija, w Pěskecach. Zakop je w 10.00 hodź.

Ministrantska kopańca

Tradicionalny koparski turněr serbskich ministrantow budže lětsa sobotu, 5. julija, w Pěskecach. Započatk je w 9.00 hodź. z Božej mšu we wjesnej cyrkwičce.